



**Operasaun Konjuntu:  
Sai Hanesan Pratika Aat Iha Setor Siguransa**

**Mahein Nia Lian Nú. 99, 24 Marsu 2015**



*Foto: PNTL 2015*

**Relatoriu Fundasaun Mahein Nia Lian ne'e suporta husi povu Amerikanu liu husi Ajéncia  
Estadus Unidus ba Dezenvolvimentu Internasional (USAID)**

**Vizaun husi autor sira ne'ebé expresa iha públikasaun relatoriu sira ne'e la representa  
vizaun husi Ajéncia Estadus Unidus ba Dezenvolvimentu Internasional (USAID)**



**Website: [www.fundasaunmahein.org](http://www.fundasaunmahein.org)**



## Kontiudu sira

Kontiudu sira	2
Introdusaun	3
Metodolojia	4
Sirkuntansia sira ne'ebé halo operasaun	4
Operasaun HANITA nia natureza	7
Politika siguransa nasional?	9
Rekomendasaun	11
Lisaun aprendisazen	12
Bibliografia	13



## Introdusaun

Iha loron 11 fulan Marsu tinan 2015 Konsellu Ministru pasa tiha ona Rezolusaun ida hodi atua grupu ilegais nia aktu ne'ebé akontese iha loron 8 fulan Marsu tinan 2015 indika hanesan krime organizadu ho nia objetivu kria instabilidade ba Nasaun.<sup>1</sup>

Kazu dahuluk liu akontese iha Lalulai loron 9 fulan Marsu tinan 2014 rezulta membru Polisia Nasional Timor-Leste (PNTL) na'in 2 kanek todan. Tutan husi ida ne'e akontesementu iha Saelari loron 15 fulan Janeiru tinan 2015 hakanek membru PNTL na'in 4 kanek todan no hadau pistola 2 no iha Samalari hakanek membru PNTL 1.<sup>2</sup>

Nune'e akontesementu tutan seluk ne'ebé grave iha Eskuadra Baguai loron 8 fulan Marsu iha tinan 2015 rezulta membru polisia na'in 4 kanek todan inklui estragus sasan ka sunu kareta polisia nian, kareta komunidadade nian, motor Estadu no privadu, sunu uma Estadu no komunidadade nian, no sasan seluk tan.<sup>3</sup>

Ho akontesementu hirak ne'e Governu nia analiza no toma pozisaun relasiona ho akontesementu sira iha leten ne'e. Indika ezistensia grupu sira nia aktu hanesan krime organizadu ho nia objetivu atu kria instabilidade ba Nasaun. Nune'e Governu adopta atusaun konjunta forsa defeza no forsa siguransa iha termus n.º 3) artigu 36) Lei n.º 2/2010, Lei Siguransa Nasional.

Konsidera lei bandu ezistensia grupu ka asosiasaun armadas no organizasaun tipu militar ka paramilitar. Nune'e Konsellu Ministru pasa tiha ona Rezolusaun Governu N.º 11/2015 iha loron 11 fulan Marsu tinan 2015.<sup>4</sup> Ho ida ne'e Governu rezolve tuir termos alinea c) n.º 1 artigu 115º Konstitusaun Repúblika Demokratiku Timor-Leste kona-bá seguransa nasional.

Hare ba rezolusaun ne'e nia haruka Fundasaun Mahein (FM) suporta maka'as atusaun konjunta ida ne'e hodi hametin lei no restaura hikas orden públika. Nune'e bele garante paz no hakamatek iha komunidadade nia leet. Portantu ho akontesementu hirak iha leten halo komunidadade sente la seguru iha sira nia hela fatin, impede movimentu públiku no atividade ekonomiku sira. Maske atusaun konjuntu ne'e la'o dadauk ona maibe atusaun ne'e tenki komprimentu ba regra empenhamentu no direitu fundamental konstitusional nian.

---

<sup>1</sup> Rezolusaun Governu N.º 11/2015 de 11 de Marsu

<sup>2</sup> Serkular Komandu Apoiu. Komandu Munisipiu Baucau – PNTL. No. Office: 128/GCD/PNTL – BCU/SCA/III/2015.

<sup>3</sup> Rezolusaun Governu N.º 11/2015 de 11 de Marsu

<sup>4</sup> Rezolusaun Governu N.º 11/2015 de 11 de Marsu

## Metodolojia

Metodolojia ne'ebé adopta iha relatoriu ne'e halo analiza ba implementasaun operasaun Forsa-tarefa ne'ebé hatur tiha ona iha Rezolusaun Governu N.º 11/2015, de 11 de Março. Husi kuadru legal nasional sira hanesan Konstitusaun Repúblika Demokratika Timor-Leste nian, Lei Siguransa Nasional, Lei Defeza Nasional, Lei Siguransa Interna, Rezolusaun Governu no Serkular Komandu Apoiu. Nune'e konklui iha relatoriu ne'e liu husi metodu ne'ebé Fundasaun Mahein (FM) adopta maka *Security Sector Discussion* (SSD).


Relatoriu ne'e nia objetivu atu esprika natureza husi operasaun ne'ebé dadaun ne'e hala'o no nia fundamentu juridiku sira. Preve mos kona-bá regra empenamentu Forsa-tarefa nian iha operasaun ne'e no política siguransa nasional. Ikus liu ho rekomendasaun no lisaun aprendizazen sira husi operasaun dahuluk sira ne'ebé hala'o ona iha Timor-Leste.

## Sirkuntansia sira ne'ebé halo operasaun

Dadaun ne'e públiku duvida kona-bá operasaun ne'ebé hasoru grupu ilegais iha Munisipiu Baucau. Duvida hirak ne'e iha públiku katak operasaun ne'e hanesan Estadu de-sitiu ka Estadu de-emerjensia.

Maske nune'e grafika kraik ne'e sei hatan ba duvida sira iha leten ne'e, iha ne'ebé tuir Konstitusaun nia haruka. Iha ambitu operasaun forsa siguransa no forsa defeza tuir natureza siguransa nian.

*Grafika 1: Situasaun siguransa no nia sirkuntansia*



**Fontes:** Konstitusaun RDTL



Iha istoria siguransa nasional Timor-Leste nian, deklarasaun Estadu de-sítu ka Estadu de-emerjensia foin akontese dala ida iha tinan 2008 hasoru grupu rebeldes ne'ebé halo atakes hasoru Prezidenti Repúblika no Premeiru-Ministru. Iha ne'ebé kuiñesidu ho “atentadu 11 Feveiru” no operasaun ne'e hanaran Operasaun Halibur.<sup>5</sup>

Nune'e atu esplika grafika iha leten, “*Estado de Guerra*” signifika Estadu iha funu laran. Iha sirkuntansia ameasa ruma mai husi rai liur ka situasaun ruma ne'ebé bele justifika ameasa ba soberania Estadu nian. Nune'e tuir Konstitusaun nia haruka Prezidenti Repúblika deit maka deklara *Estado de Guerra* ho Governu nia proposta no ho Parlamentu Nasionál nia autorizasaun, rona tiha Konsellu Estadu no Konsellu Superiór ba Defeza no Seguransa.<sup>6</sup>

*Estado de Exepção Constitucional* signifika “Estadu de-sítu ka Estadu de-emerjensia”. Ida ne'e bele jusitika iha forsa estranjeira nia agresaun efetiva ka iminente, perturbasaun maka'as ka ameasa atu iha perturbasaun ba orden konstitusionál demokrátika ka kalamidade públika maka bele deklara Estadu de-sítu ka Estadu de-emerjensia nu'udar hatur iha Konstitusaun artigu 25.<sup>7</sup> Tuir Konstitusaun nia haruka deklara Estadu de-sítu ka Estadu de-emerjensia, ho Parlamentu Nasionál nia autorizasaun, rona tiha Konsellu Estadu no Konsellu Superiór ba Defeza no Seguransa.<sup>8</sup>

*Estado de Normalidade Constitucional* signifika Estadu iha situasaun normal. Kaundu iha situasaun ruma jusitifka asaun kriminal ka perturbasaun ba orden públika. Orden konstitusionál nia haruka atuasaun mantein direitu fundamental konstitusionál nian no garante ba prosesu penal.

Nune'e mos situasaun *Estado de Guerra no Estado de Exepção Constitucional* sei iha Suspensaun ba direitu, liberdade no garantia fundamental. Maske nune'e deklarasaun ba Estadu de-sítu ka Estadu de-emerjensia tenke hatudu nia fundamentu, ho mós direitu, liberdade no garantia ida-idak ne'ebé atu suspende. Suspensaun labele naruk liu loron tolunulu nia laran, maibé bele renova fali durante tempu hanesan, kuandu preziza tebe-tebes duni.<sup>9</sup> Enkuantu iha *Estado Normalidade Constitucional* sidadaun sira goza nia liberdade tomak tuir Konstitusaun nian haruka.

Maske nune'e relatoriu dahuluk sira hanesan organizasaun sosiedade sivil no

---

<sup>5</sup> Atentadu 11 Feveiru tinan 2008 husi Grupu Alfredo Reinal Alves hakanek Prezidenti Repúblika Dr. Jose Ramos Horta iha nia rezidencia Meti-Aut, Dili no atake hasoru mos komvoiu Premieru Ministru nian iha dalan Balibar ba Dili lidera husi Gastão Salsina. Alfredo Reinaldo Alves mate iha fatin akontesementu ho nia soldade seluk. Enkuan seguransa Prezidenti Repúblika nian seluk mos hetan kanek no kareta Premeiru Ministru nian mos hetan estragus husi tiru ne'ebé lansa husi grupu Salsina nian.

<sup>6</sup> Konstitusaun Repúblika Demokratika Timor-Leste. Artigu 85) alinea h).

<sup>7</sup> Haree iha Kontitusaun Repúblika Demokratika Timor-Leste. artigu 25, n.º 1) to'o 6).

<sup>8</sup> Konstitusaun Repúblika Demokratika Timor-Leste. Artigu 85) alinea g).


<sup>9</sup> Konstitusaun Repúblika Demokratika Timor-Leste. Artigu 25).

Provedoria Direitus Humanus no Justisa (PDHJ) kestiona katak durante operasaun ne'ebé halo iha asaun sira balu justifika kona-bá sirkuntasia sira uza forsa nian resik liu ka uza forsa la tuir lei uza forsa nian no regra empenñamentu. Nune'e mosu lamentasaun no keixa husi comunidade. FM simu keixa lubuk ida husi comunidade iha tinan 2014 wainhira operasaun HABELUN hala'o iha Baukau.<sup>10</sup>

Tuir keixa husi comunidade, autoridade siguransa hato'o ba sira katak operasaun ne'ebé halo, Estadu utiliza rekursu forsa saida deit hodi atua. Nune'e iha atuasaun sira ne'ebé halo limite prinsipiu fundamentais konstitusionais nian hanesan serkulasaun no konsidera operasaun ne'e hanesan fali Estadu de Guerra no Estadu-de-sitiu ka Estadu-de-emergjensia.<sup>11</sup>

Nune'e grafika tuir mai sei hatudu kona-bá atuasaun uza forsa iha kazu sira ne'ebé temi tiha ona iha leten, Estado de Guerra, Estado de Exepção Constitucional no Estado Normalidade Constitucional. Husi reklamasaun comunidade nian durante operasaun sira dahuluk liu antes Operasaun HATINA.

*Grafika 2: Utilizasaun forsa husi autoridade sigurasan durante operasaun sira dahuluk*



Fontes: Resultadu Peskiza Fundasaun Mahein (FM) tinan 2014.

<sup>10</sup> Operasaun Habelun: Reintegra ka Ameasa? Disponivel iha: [http://www.fundasaunmahein.org/wp-content/uploads/2014/06/MNL\\_Nu.80\\_26062014\\_Operasaunpdf1.pdf](http://www.fundasaunmahein.org/wp-content/uploads/2014/06/MNL_Nu.80_26062014_Operasaunpdf1.pdf). Asesu iha liron 20 fulan Marsu tinan 2015.

<sup>11</sup> Operasaun Habelun: Reintegra ka Ameasa? Disponivel iha: [http://www.fundasaunmahein.org/wp-content/uploads/2014/06/MNL\\_Nu.80\\_26062014\\_Operasaunpdf1.pdf](http://www.fundasaunmahein.org/wp-content/uploads/2014/06/MNL_Nu.80_26062014_Operasaunpdf1.pdf). Asesu iha liron 20 fulan Marsu tinan 2015.



Entau forsa siguransa sira iha terenu utiliza situasaun sira ne'e hodi impoin atuasaun durante operasaun. Iha ne'ebé konsidera hanesan Estadu de Guerra ka Estadu-de-sitiu ka Estadu-de-emerjensia hodi uza forma atuasaun resik liu maske la iha forsa estranjeira nia agresaun efetiva ka iminente, perturbasaun maka'as ka ameasa atu iha perturbasaun maka'as ba orden konstitusionál demokrátika ka kalamidade públika.

Iha altura ne'eba FM konsidera katak operasaun ne'e uza forsa resik liu no halo julgamentu iha fatin akontesementu rasik. Ironiku liu tan, ema ne'ebé deskonfia nu'udar elementu husi grupu ilegal autoridade siguransa sira kaptura no detein iha postu operasaun ho forma investigasaun deskonfia halo torturasan no la prosesu tuir lei no prosesu penal nia haruka. Maske operasaun ne'e atu restaura hikas orden públika no garante paz no estabilidade.

FM fiar katak atuasaun sira iha leten la'os orden Komandu Operasaun nian maibe sasidik husi elementu operasaun nian nu'udar meius ka forma atuasaun ne'ebé atu deskobre alvu operasaun nian. Maibe haluha tiha katak forma hirak ne'e viola lei uza forsa nian no regra empenamentu operasaun nian.

### **Operasaun HANITA nia natureza**

Maske nune'e situasaun dadaun ne'e hasoru, justifika katak Timor-Leste iha segundu gravidade ameasa. Nune'e atuasaun Governu bele hola medida rezolusaun ida tuir Konstitusaun RDTL alinea d) n.º 1 artigu 115 kona-bá kompetensia Governu nian hodi asegura orden públika no desiplina sosial. Nune'e Rezolusaun N.º 11/2015, 11 de Março ne'ebé Konsellu Ministru hasai nia misaun atu prevene no reprimir aktu kiminozu grupu ilegais nian. Impoin ba Governu no adopta medida atuasaun konjunta forsa defeza no siguransa tuir Lei N.º 2/2010, Lei Siguransa Nasional n.º 3) artigu 36 nia haruka.

Artigu 36), n.º 3 deskreve:

*"Bele hari'i Forsa-tarefa, atu halo kordenasaun no komandu operacional husi entidade partisipante sira iha Sistema Integradu Siguransa Nasional, iha kuprimentu ba misaun espesifika husi ieguransa nasional, uainhira hare'e situasaun nia todan mak justifika katak iha razaun atu halo empenu operacional duni."*

Ho kuadru legal nasional sira hatur iha leten harii tiha ona Forsa-tarefa ida atu halo koordenasaun no komandu operacional husi entidade partisipante sira iha Sistema Integradu Siguransa Nasional ida.

Nune'e rezolusaun ne'e nia misaun atu prevene no repimir aktu kiminozu grupu ilegais nian no rezolusaun diriji ba Komandante Jeral PNTL no Chefe Estado Maior General das Forças Armadas (CEMGFA) hodi atua tuir rezolusaun nia haruka.<sup>12</sup>

---

<sup>12</sup> Rezolusaun Governu N.º 11/2015 de 11 de Mars



- a) *Aprovar o empenhamento operacional conjunto da PNTL e das FALINTIL-Força Defesa Timor-Leste (F-FDTL) de modo a prevenir e a reprimir a actuaçã criminosa de grupos ilegais que estão a causar instabilidade no país, arrives de operações conjuntas de actuação proporcional no uso da força;*
- b) *Encarregar o Comando Geral da PNTL e o Chefe Estado Maior General das Forças Armadas, de criar uma forças-tarefa, integrando a PNTL e as F-FDTL, a fim de dar execução às operações de segurança*
- c) *Instruir o Chefe Estado Maior General das F-FDTL e o Comandante Geral da PNTL para elaborar e propôr ao Conselho de Ministros as Regras de Empenhamento para a Força-tarefa;*
- d) *Instruir o Chefe Estado Maior General das F-FDTL e o Comandante Geral das PNTL para implementar com a maxima urgência a presente Resolução.*

Tradusaun la ofisial .....

- a) *Aprova empeñamentu operasional konjuntu PNTL no F-FDTL atu prevene no reprimir aktu kriminozu grupu ilegal ne'ebé kauza instabilidade ba Nasaun, operasaun konjunta nia atuasaun uza forsa ho proporsional.*
- b) *Orienta ba Komandante Jeral PNTL no Chefe Estado Maior General F-FDTL hodi kria forsa-tarefa ida, integradu PNTL no F-FDTL, hodi ezekuta operasaun siguransa no hala'o rezolusaun ida ne'e.*
- c) *Instrusaun ba Chefe Estado Maior das F-FDTL no Komandante Jeral PNTL atu elabora no hato'o ba Konsellu Ministru kona-bá Regra Empeñamentu Forsa-tarefa nian.*
- d) *Instrusaun ba Chefe Estado Maior das F-FDTL no Komandante Jeral PNTL implementa rezolusaun ida ne'e ho maxima urjensia.*

Maske nune'e esperiensa operasaun dahuluk sira hatudu tiha ona katak wainhira operasaun ne'e la'o no retira. Relatoriu husi organizasaun sociedade sivil, PDHJ no keixa husi comunidade sira hato'o katak iha violasaun balu ba regra empeñamentu no prinsipiu baziku konstitusional nian.

Ho ida ne'e FM rekomenda ba operasaun Forsa-tarefa prezisa komprimentu ba regra empeñamentu ne'ebé Konsellu Ministru aprova ona. Tuir Lei N.º 2/2010 Lei Siguransa Nasional artigu 7 kona-bá uza forsa nian maka hanesan deskreve iha kraik ne'e.

Aritgu 7, Lei Siguransa Nasional.

1. *Uza forsa no ameasa atu uza forsa hosi Forsa Defeza no hosi Forsa no Servisu sira Seguransa sei hare'e, deit, ba Konstituisaun no lei iha vigor, liu-liu ba regra sira hosi Direitu Internasional mak hala'o iha Timor-Leste.*
2. *Uza forsa, ameasa atu uza forsa ka hala'o knar ho uza forsa sei hetan kontrolu, politiku no juridiku, hosi definisaun ba regra empeñamentu nian.*
3. *Regra sira empeñamentu nian ba forsa no ema mesak, iha nível hotu-hotu komandu nian, sei defini sirkunstansia, kondisaun, grau no forma, ne'ebé mak forsa ne'e bele uza.*
4. *Regra sira empeñamentu nian hakru'uk ba direitu, liberdade no garantia sira emasidadaun nian, direitu ema no povu nian, prinsipiu legalidade, liu-liu norma sira hosi direitu internacional mak iha vigor.*





5. *Regra sira empenhamentu tuir ho tipu kazu satu uza forsa nian, hosi entidade tomak mak forma Sistema Integradu ba Seguransa Nasional, ses hosi kazu lejítima defeza, ema mesak no atu halo protesau ba forsa.*
6. *Regra sira empenhamentu ba FALINTIL-FDTL (F-FDTL) sei hato'o hosi Xefe Estadu Maior Jeneral Forsa Armada (CEMGFA) no, ba Polisia Nasional Timor-Leste (PNTL), hosi Komandante-Jeral PNTL, hetan aprovasaun, iha kazu rua ne'e, hosi Konsellu Ministru no halo ratifikasaun hosi Prezidente Repúblika, uainhira envolve empenhamentu hosi F-FDTL.*

## **Politika Siguransa Nasional?**

Hatur tiha ona iha kadru legal nasional Timor-Leste nian kona-bá siguransa nasional. Nune'e difine iha Lei Siguransa Nasional artigu 11) kona-bá politika siguransa nasional. Iha ne'ebé ho hatur politika siguransa nasional Timor-Leste nian maka:

1. *Estadu hala'o konjuntu ida koerente ba prinsipiu, objetivu, orientasaun no sasukat ka medida sira hodi adopta ba defeza integrada hosi ninia elementu esensial sira.*
2. *Politika Seguransa Nasional buka garante, liu-liu, kordenasaun ba knar sira Defeza Nasional, Seguransa Rai-laran ka Interna no Protesaun Sivil nian, la halakon ninia konkretizasaun no dezvoltamentu sektorial.*
3. *Seguransa Nasional iha nesesidade, dever mak mai hosi ne'e no liña jeral sira Politika Seguransa Nasional nian sai nudar objetu ba informasaun pública, bei-beik no halo atualizasaun nafatin.*

Nune'e difine mos ninia karakteristik iha artigu 12) Lei Siguransa Nasional:

*Politika Seguransa Nasional iha karakter:*

1. *Nasional, buka hare'e ba teritoriu nasional tomak no halo parte ema-sidadaun nasional hotu, hanesan mos organizasaun sosial tradisional;*
2. *Integradu, órgaun tomak, ema koletiva no departamentu hosi Estadu iha kbi'it atu promove kondisaun sira ne'ebé mak presiza ba ninia ezekusaun;*
3. *Global, hakuak komponete militar no komponete la'os militar sira hotu;*
4. *Permanente, hala'o iha tempu tomak no iha fatin ne'ebé deit.*

Maske nune'e Lei Siguransa Nasional difine tiha ona politika siguransa nasional ho nia karakteristik. Maibe atu hatan objetivu permanente husi politika siguransa nasional ne'e rasik to'o agora Governu seidauk formula no hatur kona-bá politika siguransa nasional. Iha ne'ebé husi Lei Siguransa Nasional artigu 13) n.º 1) nia hatete:

*"Governu mak formula Politika ba Seguransa Nasional, halo tuir termu sira hosi Konstitusaun, no tuir mos Objetivu Permanente mak hakerek ona iha lei ne'e".*

Nune'e mos objetivu permanente seluk husi artigu 13) husi Lei Siguransa Nasional ne'e rasik. Hodi hatan ba Konstitusaun RDTL artigu 6) nia haruka ne'ebé difine kona-bá objetivu fundamentais Estadu nian iha n.º 1) defende no garante país nia soberania. Portantu ameasa ohin loron sai kompleksu liu tan ho natureza transnacional, asimétrica no multidireksional.



Maske nune'e hatur ona mos kona-bá kuadru nasional sira seluk hodi hatan ba ameasa sira ne'e hanesan defeza nasional, siguransa interna no protesau n sivil. Iha ne'ebé hodi satan objetivu fundamental Estadu nian husi ameasa sira.<sup>13</sup>

Nune'e iha artigu 18) Lei Seguransa Nasional kona-bá Sistema Integradu Siguransa Nasional (SISN). Iha SINS ne'e rasik hatur nia misaun idak-idak no la halakon sira nia autonomia no identidade.<sup>14</sup> Iha ne'ebé difine autoridade sira ne'ebé hola parte iha SISN maka kompostu husi:

- a) FALINTIL-FDTL;
- b) PNTL;
- c) Servisu Nasional Intelijensia;
- d) Autoridade Protesau n Sivil, mak tama mos Korpu Bombeiru sira;
- e) Sistema Autoridade Marítima (Tasi nian);
- f) Autoridade Aeronautika;
- g) Servisu Prizional sira;
- h) Servisu Migrasaun;
- i) Seguransa Sivil;
- j) Alfandegas;
- k) Konsellu Distritu sira ba Seguransa;
- l) Servisu Kuarentena.

Tanba, SISN fo privilejju ba komplementaridade no hagle'an kolaborasaun husi entidade sira ne'ebé maka forma SISN, iha aspetu operacional, treinu no lojistika, hodi bele hadia didiak rekursu sira no halo kumprimentu ba misaun sira ho efisiensia boot. Iha konfigurasaun husi forsa defeza no husi forsa no serbisu sira siguransa no ajente sira Protesau n Sivil hodi partisipa iha SISN, buka promove flexibilidade, mobilidade no interoperabilidade rekursu sira nian. Sistema Integradu Siguransa nian buka hametin koperasaun sivil no militar, liu-liu fo privilejju ba ligasaun kolot ida ho organizasaun tradisional.<sup>15</sup>

Maibe to'o agora iha ka lae kona-bá koordenasaun SISN? FM nia monitorizasaun durante ne'e akontese deit forsa konjunta iha atuasaun sira hasoru perturbasaun ba orden públika iha kazu operasaun sira durante ne'e akontese, hanesan dadaun ne'e akontese Operasaun HATINA hasoru grupu ilegal sira. Maske entidade sira forma SISN ne'e la'os deit mai husi deit F-FDTL no PNTL maibe institusaun barak maka hola parte hanesan temi tiha ona iha artigu 18) Lei Siguransa Nasional.

Nune'e mos serbisu seluk hatur tiha ona Lei Siguransa Nasional kona-bá Organizasaun no Funseionamentu Sistema Integradu Siguransa Nasional. Hodi hatur komponente importante rua hanesan Komisaun Interministerial ba Siguransa no

<sup>13</sup> Haree iha Konstituisaun Repúblika Demokratika Timor-Leste artigu 6) ne'ebé difine kona-bá objetivu fundamentais Estadu nian.

<sup>14</sup> Lei N.º 2/2010 de 21 de Abril, Lei Seguransa Nasional, artigu 18), n.º 1).

<sup>15</sup> Lei N.º 2/2010 de 21 de Abril, Lei Seguransa Nasional, artigu 18), n.º 2) 3) no 4).



Sentru Integradu Jestaun ba Krize. To'o agora seidauk iha politika nasional ida kona-bá serbisu ida ne'e nian. Maske iha atuasaun balu konjunta maibe insidental deit no depende ba situasaun balu ezize atu serbisu konjunta. Ironiku liu, autoridade sira ne'ebé hola parte Komisaun Interministerial ba Siguransa no Sentru Integradu Jestaun ba Krize seidauk harii. Ezemplu, Autoridade Nasional Maritima, Konsellu Dlistrais ba Siguransa no responsavel seluk hanesan Diretor Sentru Integradu Jestaun Krize.

Kazu seluk husi FM nia monitorizasaun kona-bá Protesaun Sivil nian. Ida ne'e servisu importante ida SISN nian ne'ebé durante ne'e tutela ba Ministériu Interior maibe públiku duvida kona-bá nia serbisu lolos ne'e saida? Nune'e Korpu Bombeiros sai kna'al importante ida no públiku identiku Protesaun Sivil maka Korpu Bombeiros. Maske Protesaun Sivil komponente importante ida nu'udar hatur iha Lei Siguransa Nasional.

Iha kazu Protesaun Sivil nian, hare ba kazu sira dezastre naturais nian tan seidauk iha Sentru Integradu Jestaun Krize, ministériu idak-idak la'o ketak-ketak. Kazu hanesan deklarasaun ba situasaun alerta ba dezastre naturais, previzaun tempu no asidenti ruma. Ironiku liu tan *Direcção Nacional de Gestão de Desastres* (DNGD) ne'ebé tutela ba Ministériu Solidaridade Sosial fokus ba liu ajuda umanitaria no sistema alerta la ho koordinasaun ho ministériu seluk hanesan Protesaun Sivil iha Ministériu Interior nia administrasaun. Nune'e sistema alerta DNGD halo liu husi facebook hodi hato'o informasaun sira kona-bá previzaun tempu. Maske autoridade sira ne'e maka hamutuk forma SISN.

## **Rekomendasaun**

Iha loron 21 fulan Marsu tinan 2015 lansa ona operasaun konjuntu forsa siguransa no forsa defeza hodi atua grupu kriminozu sira. FM suporta maka'as operasaun ne'e hodi hametin lei no restaura hikas orden públiku. Nune'e operasaun ida ne'e nesesariu tebes hodi atua kualker asaun ne'ebé provoca no perturbe orden públika. Maske nune'e, operasaun tenki la'o tuir natureza operasaun nian nu'udar hatur iha lei siguransa nasional, regra empenñamentu no la preojudika ba normalidade bázika no direitu fundamental sira konstitusional nian.

Iha lidun ida ne'e, operasaun mos sai ona toman agresiva politika setor siguransa Timor-Leste nian. Siginifika katak ita investe maka'as iha funu la'os investe maka'as iha harii paz no setor justisa. Tan buat kiik ka boot rezolve ho operasaun.

Tanba ne'e, Timor-Leste tenki formula ona polítika siguransa nasional ida hodi hatan ba ameasa sira ohin loron hasoru. Nu'udar kazu konkretu iha situasaun sira atual, akontese deit maka operasaun konjunta forsa siguransa no forsa defeza ba situasaun ruma. Maske Lei Seguransa Nasional difine klaru ona kona-bá SISN no involve autoridade barak hodi forma SISN.



1. Uza forsa ho nesesariu no tuir lei uza forsa nian
2. Komprimentu ba regra empenementu operasaun nian
3. Operasaun ne'e tenki hato'o Prezidenti Repúblika kada semana iha nia kualidade nu'udar Komandante Supremu Forsa Armada.
4. Relatoriu operasaun tenki hato'o ba Parlamentu Nasional iha ambitu situasaun siguransa no orsamentu ba operasaun ne'e rasik.
5. Progresu operasaun presiza hato'o ba públiku liu husi media nasional sira kona-bá situasaun seguransa durante operasaun.
6. Rekomenda ba públiku tomak atu sai mahein diak ba operasaun ne'e no hato'o keixa ba Komandu Operasaun Konjunta no autoridade judisiariu sira kona-bá violasaun sira ba lei, regra emepeñamentu no prinsipiu fundamental sira konstitusional nian.

### ***Lisaun aprendisazen***

FM husu tenki iha tratamentu ida integradu husi ministeriu hotu nune'e bele reintegra hikas komidade depois operasaun ne'e la'o. Esperiansia hatudu ona iha operasaun sira dahuluk, hafoin operasaun mosu lamentasaun no keixa barak husi komidade katak forsa siguransa nia atuasaun viola prinsipiu baziku sira konstitusaun nian no atuasaun sira fora husi normalidade bazika ka uza forsa resin liu.



## Bibliografia

DEKRETU-LEI No. 43/2011, 21 Setembru. REJIME JURÍDIKU KONA-BA UZU FORSA NIAN

Konstitusaun Repúblika Demokratika Timor-Leste

Lei N.º 2/2010 de 21 de Abril, Lei Seguransa Nasional

Lei N.º 3/2010 de 21 de Abril, Lei Defeza Nasional

Lei N.º 4/2010 de 21 de Abril, Lei Seguransa Interna

Rezolusaun Governu N.º 11/2015 de 11 de Marsu

Operasaun Habelun: Reintegra ka Ameasa? Disponivel iha:  
[http://www.fundasaunmahein.org/wp-content/uploads/2014/06/MNL\\_Nu.80\\_26062014\\_Operasaunpdf1.pdf](http://www.fundasaunmahein.org/wp-content/uploads/2014/06/MNL_Nu.80_26062014_Operasaunpdf1.pdf). Asesu iha loron 20 fulan Marsu tinan 2015.

Serkular Komandu Apoiu. Komandu Munisipiu Baucau – PNTL. No. office: 128/GCD/PNTL – BCU/SCA/III/2015.